




ԽՄԲԱԳՐԱԿԱՆ

ՓԱՌԲ ՀԱՐՈՒԹՅԱՆ ՔՈ, ՏԵՐ

Քրիստոնյա ողջ մարդկությունը ևս մեկ անգամ ողջունեց Քրիստոսի հրաշափառ Հարության ավետիսը, ավետիս, որը մարդկությանը պարգևում է ճշմարտությամբ հաղթանակելու ոգի:

Թափուր մնացած գերեզմանի եղելությունը դարձավ կյանքը հարության շնչով ապրելու իրողություն:

Հրեշտակի ավետիսը զգաստացնող բարբառով ազդարարեց առաջին վկաներին. «Զի՞ խնդրէք զկենդանին ընդ մեռեալս. չէ աստ, այլ յարեալ» (Ղուկ. ԻԴ 5):

Հարյա՛վ...

Քրիստոս հարություն առավ և Իր հարությամբ մեզ նոր կյանք պարգեւեց:

Հարության զորությունը մարդկությանը նոր ոգի տվեց, առանց այդ հարության չկա՝ քրիստոնեական քարոզչություն, և առանց այդ հարության ընդունայն է ամենայն հավատք:

Հիշենք Պողոս առաքյալի աստվածաշունչ խոսքերը. «Եթէ Քրիստոս չիցէ յարուցեալ՝ ընդունայն է քարոզութիւնն մեր, ընդունայն եմ եւ հաւատքըն ձեր» (Ա. Կորնթ. ԺԵ 14):

Որքան գեղեցիկ է հավատքի սերը, որն այսօր հնչեցնում է ավետիսը լուսապայծառ հարության:

— Փա՛ռք Քրիստոսի ամենագոր հարության:

Փառք նրա անմահարար խորհրդին, որ ողջ մարդկությանն օժեց զվարթարար տեսությամբ, այն է՝ ապրել կյանքը հարության հաղթանակի ոգով:

Նորոգված հարության շնչով և գոտեպնդված ավետարանի առաջին վկաների հավատքով, հրեշտակի քաղցր բարբառը հնչում է կրկին.

«Զէ աստ, այլ յարեալ»:

Մահվամբ մահը հաղթած Քրիստոսի կենսագործող լուսափայլ հարության շունչը վերստին խնկում է ողջ տիեզերքը՝ բոլորին պարգևելով կյանքը ապրելու քրիստոնեական սեր, մահից չսոսկալու հավատք և անմահությանը ձգտող հույս:

Այսօր, հարության պայծառ աչք տոնին, մենք մեզ զգում ենք հաղթող ու հզոր՝ խավարային բոլոր ուժերի դիմաց: Զարդարված Քրիստոսի նորափետուր հարության պատմումանով, չենք սոսկում ո՛չ չարից և ո՛չ էլ դժոխքից, այլ վերստին հիշում ենք առաքյալի ասվածաշունչ խոսքերը. «Ու՛ր է, մահ, քո տանջանքը, ո՛ւր է, դժոխք, քո խայթոցը» (Ա Կորնթ. ԺԵ 55):

Քրիստոսի հարությունը դարձավ կյանքի զորությունը:

Քրիստոնեական հավատքով լուսավորված յուրաքանչյուր մարդ ձըգտում է ճանաչել նրան «և նրա հարության զորությունը» (Փիլիպ. Գ 10):

Այդ զորությունն է քրիստոնյային՝ կյանքի ճանապարհ:

Այդ զորությունն է քրիստոնյային՝ հավատքի աղբյուր:

Այդ զորությունն է քրիստոնյային՝ անմահության հույս:

Մեր հայրերի դավանած հավատքով ողջունենք ՍՈՒՐԲ ԶԱՏԻԿԸ՝ հետևելով Քրիստոսի կենդանարար պատգամին. «Ես իսկ եմ հարություն և կյանք, ով հավատում է ինձ, թեպետ և մեռնի, կապրի, և ով կենդանի է ու ինձ հավատում է, հավիտյան չի մեռնի» (Հովհ. ԺԱ 25—26):

Եվ երգենք անվերջ Հարության տեսիլքով.

«—Փառք յարութեան քո Տէր.

Ես ոչ դադարեցայց օրհնել զՔեզ

Զամենայն աւուրս կենդանութեան իմոյ»:

